

1963-11-22

Donostia'n, Diputazio-etxean, milla bederatzireun eta irurogei ta irugarren urteko Otsaillaren ogei ta bian, Lekuona jauna buru dala, eta Loidi jaunak zadorlari-ordezko egiten dueia, illeroko Euskaltzaindi'ko batzarrera, aldamenean agertzen diran euskaltzain eta urgazle jaunak bildu dira: Lekuona, Villasante, Gorostiaga, Euskaltzain jaunak. Arizti, Irigoien, Artola, Arruza, San Martin, Zabala, Loidi, Urgazle jaunak. Bertan arkitzen da Juan Maria Lekuona jauna ere.

Eguerdiko amabi t'erdia dirala, oi dan bezela, otoitz egiñaz asi da batzarra.

Joan dan illeko batzar-agiria irakurri da. Gorostiaga jaunak, agiri ori ontzat artu baiño leen, Altube jaunak eta berak Euskaltzaindiari idatzitako idazki bat irakurri nai lukela dio. Irakurtzeko baimena eman ondoren, idazki luze bat irakurtzen du. Labur esanaz auxe dio bertan: Joan dan illean, euskaltzain berriak (bizkaitarrak batez ere) izendatzekoan, ez zala Euskaltzaindi'ko araudiak diona bete, eta, ori dala-ta, ezin dutela gai oni dagokionean, batzar ortako erabakiak ontzat artu. Eztabaida bat sortzen da. Bildu diran geienak agertzen dute beren iritzia. Azkenean erabaki auek artzen dira:

Idazki ori Euskaltzaindiak artzen du. Erantzuna datorren batzarrean erabakiko da. Joan dan illeko batzar-agiria ez da ontzat artzen.

Gorostiaga jaunak, berak, Lafitte, Krutwig, Altube, eta Eppherre jaunak izenpetu duten idazki bat irakurtzen du; bertan, Euskaltzaindi'ko araudiak diona beterik, Erkiaga eta Akesolo jaunak euskaltzain eta Uriarte jauna euskaltzain ordezko izendatzeko eskatzen dute. Erabakia: Euskaltzaindiak idazki au artutzat ematen du, datorren illean, araudiari jarraituz, erabakia artu dezan.

Euskaltzaindi'koeri eskerrak emanaz, Satrustegi eta Larzabal jaunen idazkiak irakurtzen dira.

Arruza eta Gorostiaga jaunak, euskerazko irrati saioak asiko dirala laister Bilbo'n adierazten dute.

Irigoyen jaunak, Bizkai'ko "Junta de Cultura"-koak Euskaltzaindiari zuzentzen dioten idazki bat irakurtzen du. Bertan diotenez, berak antolatu duten sariketan epai-lekuko izan ditezen, Euskaltzaindi'ko biren izenak eskatzen dituzte. Erabakia: Villasante eta San Martin jaunak izendatzen dira ontarako.

Gorostiaga jaunak galdetzen du ia Oleaga jaunaren ordez nor dagoen izendatua Euskaltzaindian Bizkai'ko "Junta de Cultura"-kin izan lezakean artu-emanetarako. Izendatu bedi.

San Martin jaunak, Eibarko Felix Aldazabal jaunak egindako atzenaiaren zati bat irakurtzen du. Berak dionez, Eibar'ko "Sparrua" izeneko lagunarteari, beste agin-

du batzuen artean, urtero, euskeraz irakurtzen eta idazten ongiena dakiten neska-mutillen artean, sariak banatu dezan, amar milla peseta uzten dizka. Lagunarte ontakoak Euskaltzaindiari laguntza eskatzen diote. Erabakia: eskatu bezate urtero eta lagundu bezayote.

Irigoyen jaunak, azkeneko agirian onako au aztuta utzi zala dio: "Arrue'k diño Juan Maria Lekuona jauna urgazle izentau bear litzakeala. Ain zuzen be Euskaltzaindiak egin dituen bertsolarien txapelketetako lankide on bat izan da, beste merezi-mentu batzuez gañera. Urgazleak egiteko garaia datorrenean egin bedi".

Manuel Lekuona, F. Artola, Juan Maria Lekuona, A. Irigoyen, A. Zabala eta J. San Martin jaunak izenpetutako idazki bat irakurtzen da. Onela dio: "Bildu dira Donostiako Diputazioan bertso paper sariketa erabaki bear zuten juradukoak eta ao batez erabaki dute: Lenengo saria Ibai-ertz'ek egindako bertso sortari ematea. Bigarrena Sebastian Salaberria'k Ama Euskerari jarritako sortari. Irugarrena Manuel Uranga'k Ama Alargunari jarritako sortari. Ta laugarrena Basilio Pujana'k jarritako sortari. Donostian 1963 Otsaillaren 22'an".

Eta besterik gabe, arratsaldeko ordu biak dirala, euskaltzain buruak batzarra bukatutzat ematen du eta Loidi jaunak agiri au jaso eta maiburukoarekin batera izenpetzen duela, ziñaltzen du.